

傷寒譜

傷寒譜卷四

後漢張機仲景原文

嘉定沈鳳輝丹彩集註

金山

憩南錢樹棠
素然錢樹立校刻

陽明經大意

金鑑云陽明有經證有府證如身熱煩渴目痛鼻乾不
得眠不惡寒反惡熱者此陽明經病也如潮熱譫語手
足腋下濺然汗出腹滿痛大便鞭者此陽明府病也而
其候各有三經病則有邪已傳陽明而太陽之表未罷
兼見頭痛惡寒無汗者有太陽之邪悉傳陽明但見壯
熱有汗心煩不眠口渴引飲者有陽明之邪未已轉少

陽而兼見往來寒熱口苦而嘔目眩耳聾脇痛者府病則有太陽或發汗或吐下或利小便亡其津液胃中乾燥太陽之邪乘胃燥而轉屬陽明致小便反數大便鞭者所謂太陽陽明脾約是也有陽氣素盛或挾宿食太陽之邪一傳陽明遂入胃府致大便不通者所謂正陽陽明胃家實是也有邪已到少陽法當和解而反發汗利小便胃亡津液而復轉屬陽明致大便結燥者所謂少陽陽明大便難是也然在經有寒證亦有熱證入府有熱證亦有寒證彙而次之須知陽明有經病不得妄下陽明有府寒亦不得妄攻也

陽明上篇

陽明之爲病胃家實也

柯韻伯云陽明爲傳化之府當更實更虛食入胃實而腸虛食下腸實而胃虛若但實不虛斯陽明胃府病矣故以胃家實爲陽明病之總綱也然致實之由最宜詳審有風寒外束熱不得越而實者有妄汗吐下重亡津液而實者有從本經熱甚而實者有從他經轉屬而實者此只舉其病源勿以胃實便爲可下之證又按胃實爲陽明病提綱與內經熱論不同熱論重在經絡病爲在經此以裏證爲主病爲在府若在經之病不入此例

總之陽明爲閤凡裏證不和者卽爲闔病不大便固闔也不小便亦閤也初飲食反不能食皆閤也自汗出表開而裏閤也故提綱獨以胃實爲正胃實不是竟指燥屎堅硬只對下利言下利則胃家不實矣所以然者陽明太陰同處中州而所司各別胃司納故以陽明主實脾司輸故以太陰主利是二經所由分也

沈堯封云此是陽明病提綱後稱陽明病三字俱有胃家實在內胃家實言以手按胃中實鞭也如大陷胸證按之石鞭卽名實熱梔子豉證按之心下濡卽名虛煩夫心下俱以濡硬分虛實何獨胃中不以濡硬分虛實

乎註家皆云胃家本實所以病入陽明但此作推原入陽明之故則可若卽作胃家實正面則本是實而可據之語反成空論教人無處認證此大不可也

問曰陽明病外證云何答曰身熱汗目出不惡寒反惡熱也

沈堯封云陽明病或發熱或潮熱總無身不熱之陽明身不熱而胃似實是太陰而非陽明矣或汗多或微汗總無不汗出之陽明不汗出而胃似實非兼外證卽屬久虛與寒濕非眞陽明病也夫惡寒太陽證也微惡寒不惡熱者猶未離乎太陽也惟不惡寒反惡熱乃是陽

明的證註家皆以胃家實爲在內之府病承氣湯主治
以身熱汗出惡熱爲在外之經病桂枝湯主治不思桂
枝湯爲惡寒而設若不惡寒反惡熱如何可用桂枝耶
要之胃家實是在內之證據本節是在外之證據須內
外俱備方是真陽明可下證若一證不具卽非真陽明
證雖非真陽明而胃實已見不得不稱陽明稱陽明而
類敘一處以便同中審異耳

柯韻伯云陽明主裏而亦有外證者有諸中而形諸外
非另有外證也胃熱之外見者其身蒸蒸然裏熱熾而
達於外與太陽表邪發熱者不同其汗則濺濺然從內

溢而無止息與太陽風邪爲汗者不同表寒已解故不惡寒裏熱已盛故反惡熱只因有胃家實之病根卽見熱盛汗出之外證不惡寒反惡熱之病情然此但言病機發見非卽胃家燥實可下之證也宜輕劑以和之必識語潮熱煩躁脹滿諸證兼見纔爲可下也

問曰病有一日得之不發發當作惡熱而惡寒者何也答曰雖得之一日惡寒將自罷卽自汗出而惡熱也

錢天來云此設問答以辨陽明之經邪與太陽經之表證迥異也夫太陽有六七日表證仍在而惡寒者惟陽明之邪入於肌肉之分雖得之一日卽鬱爲熱故不待

解散惡寒自罷卽自汗出而惡熱矣

柯韻伯云此因本經自受寒邪胃陽中發寒邪反從熱化故耳本經受病之初其惡寒雖與太陽同然得之一日卽不惡寒而反惡熱之病情是陽明之的候

陳平伯云此言陽明病不惡寒反惡熱之見證條中不發熱三字當是不惡熱之誤夫太陽病而發於陽尙卽發熱安有兩陽合明之經受病而反不發熱者細玩問答義自顯然

問曰惡寒何故自罷答曰陽明居中土也萬物所歸無所復傳始雖惡寒二日自止此爲陽明病也

柯韻伯云陽明惡寒未經表散卽能自止與他經不同者以胃爲戊土位處中州表寒裏熱之邪無所不歸無所不化皆從燥化而爲實實則無所復傳此胃家實所以爲陽明之病根也

錢天來云此舉邪入陽明之大意謂太陽專主乎表必因誤治而入裏陽明專主乎裏六經之邪皆可歸入邪旣入胃不比在經之邪而能遊行遍傳故云萬物所歸無所復傳而成陽明胃實之證

陳平伯云此申言惡寒所以自罷之故而舉入府之證言者以陽明在經之邪未離太陽者尙多或已化熱或

未化熱總不若入府者之悉從火化而純熱無寒也學者勿因辭害義而謂陽明之不惡寒者定是胃實之候問曰何緣得陽明病答曰太陽病若發汗若下若利小便此亡津液胃中乾燥因轉屬陽明不更衣內實大便難者此名陽明也

金鑑云何緣得陽明胃實之病答曰由邪在太陽時發汗若下若利小便皆爲去邪而設治之誠當則邪解而愈矣如其不當徒亡津液致胃中乾燥則未盡之表邪乘其燥熱因而轉屬陽明爲胃實之病矣但細玩原文其義有三曰不更衣卽不大便蓋古人入廁必更衣也

此卽太陽陽明之脾約證曰內實卽正陽陽明胃家實是也曰大便難卽少陽陽明大便難是也三者均爲可下之證然不無輕重之別脾約自輕於大便難大便難自輕於胃家實蓋病脾約大便難者每因津液素虧或汗下利小便施治失宜所致蓋胃實者其人陽氣素盛胃有宿食卽未經汗下而亦入胃成實也故已經汗下者爲奪血致燥之陽明治以滋燥爲主未經汗下者爲熱盛致燥之陽明治以攻熱爲急此三承氣脾約丸及蜜煎杜瓜根豬膽汁導法之所由分也

柯韻伯云此明太陽轉屬陽明之病因入津液故成胃

家實之證也按仲景所立陽明病機原本經脈篇主津液所生病句來故雖有身熱鼻乾等證總歸重在津液上如中風之口苦咽乾鼻乾不得汗身目黃小便難皆津液不足所致如腹滿小便不利水穀不別等證亦津液不化使然然後知仲景治陽明以存津液爲務而諄諄相告也

問曰病有太陽陽明有正陽陽明有少陽陽明何謂也答曰太陽陽明者脾約是也正陽陽明者胃家實是也少陽陽明者發汗利小便已胃中燥煩實大便難者是也

錢天來云太陽陽明者言病在太陽因發汗吐下後邪

傳陽明太陽未罷而胃液已亡則大便難而爲脾約證也正陽陽明者言太陽之邪悉入陽明之府表證全解而成可下之證者爲胃家實是也少陽陽明者已屬少陽經邪此時不可發汗利小便若誤汗利小便胃中津液乾燥而少陽之邪勢必併入陽明陽明之津液愈乾則燥煩胃氣不下行而大便難故曰胃中燥煩實大便難是也再按太陽陽明爲病因胃津枯燥脾氣無津可散腸胃燥結故曰脾約而有和胃潤燥之法正陽陽明爲病乃邪熱宿垢實滿於胃故曰胃實而有蕩滌之劑少陽陽明爲病不從柴胡例和解反發汗利小便劫燥

胃津致使少陽之邪復併陽明故云燥煩實大便難也
仲景雖不言治而治法不出大柴胡例矣

傷寒發熱無汗嘔不能食而反汗出濇濇然者是轉屬陽
明也

喻嘉言云濇濇者肌肉開而微汗不乾之貌發熱無汗
嘔不能食皆傷寒之見證也傷寒本無汗何以反濇濇
然汗出可見證已轉屬陽明矣

沈堯曰云此本風寒兩傷營衛之麻黃證而裏有宿食
者其後無汗變爲自汗發熱變爲潮熱嘔者變爲不嘔
不能食者變爲能食寒邪解散風氣獨存內合宿食而

轉屬陽明府病矣較之正陽陽明而轉屬差遲較之太陽陽明又未經誤治然當其方轉屬之際未必諸證盡變但認汗出濺濺卽轉屬之機也

本太陽病初得時發其汗汗先出不徹因轉屬陽明也

陳亮師云此節是推轉屬陽明之故有因汗出不徹者與前何緣得陽明病節互相發明夫發汗所以驅邪不可太過不可不及前節攻太陽之邪津液亡而邪不去乃治之太過而轉屬陽明也此節病在太陽汗之不徹邪重汗輕不能外解勢必入裡此治之不及而轉屬陽明也是故太陽從表而入之邪必使之從表而出無過

不及始無貽患矣

傷寒三日陽明脈大

錢天來云邪在太陽則脈浮在少陽則脈弦而皆不言脈大惟兩陽合明之經水穀之海多氣多血邪併於此無太少兩陽之兼證者故惡熱而脈大也傷寒至三日而脈大者鬱寒成熱必見於三日後也惟脈大爲陽明熱病之脈若陽明脈遲及浮緩浮緊浮弦之類非中氣虛寒卽太少兼證之脈而非陽明病熱之脈矣

汪苓友云脈大者指下洪長也陽明脈大其義有二邪併於經則脈大邪入於府亦脈大大抵脈大而浮者邪